

當劇者

部數 二

劇中人

賀雙卿

場次

123456

置 自

一年一度燕歸來

紀淮良 先

紀橫波 後

賀雙卿

李蘭香 先

紀血梅 後

李棲鳳

多貝爾

李老夫人

任劍輝

芳艷芬

白雪仙

白雪仙

陳錦棠

梁醒波

靚次伯

樓夢相

蝶痕

翠翠

魯松

魯岳

甲 刀斧手

乙

(第一場) (吉慶橋旁細梅琴苑)

正面吉慶橋，衣邊琴苑門口，有小路入衣，兩邊佈滿梅花

小古裝

(排子頭起幕)(搥戰鼓)

(夢湘歌女身，衣邊琴苑上花下句)聽得雷鳴金鼓，魄散魂離。火網罩殘橋，逃亡仍不易。(白杭)

才女賀雙卿，苦戀一名士，相戀已三年，去年經產子，一年一度燕歸來，今日歸來賊兵至，抱

頭相痛哭，腸斷怕別離

(力力古，賀雙卿抱斗官一路狂叫淮良追淮良衣邊琴苑同上介)

(雙卿跪地悲咽口古)淮良三年來你每年番呢睇我一兩次嘅啫，今日戰鼓雷鳴，你何以忍心別去。

(淮良口古)雙卿，清兵已攻破楊州，史可法已慷慨就義，我係佢幕下著名文膽，我重唔逃亡恐怕插

翅都難飛。

(夢湘口古)紀先生，你走你應該帶埋雙卿姐走，手抱住一個肚裏面又陀住一個，兩筆蘇州屎呀。

(淮良口古) 唉，雙卿，我都唔捨得離開你兩母子，不過有婦孺陀手拎腳，你叫我點走得郁呢，我死本無足惜，不過想為明室留回此有用之軀。。

(雙卿乙反二王下句) 良臣當殉國，莫效兒女情痴。。掩面低徊，臨別更無一語。

(淮良乙反二王下句) 卿本深明大義，含淚忍讓鶯飛。。望有日合浦珠還，莫鑄成斷腸恨史。

(搗戰鼓介) (淮良欲下介)

(雙卿交斗官與夢湘執住淮口古) 淮良，咁你準備慝埋係邊處，你要話比我聽至得架，今日別離都總有望相逢嘅日子。

(淮良口古) 我準備慝係黃石磯破窰之內，除咗兩個心腹重臣同我暗通消息之外，你千祈唔好話比人知。。

(大笛斗官叫介)

(淮良長花下句) 死別離，生別離，朵朵梅花淚淋漓，慘聽兒啼心有刺，忍看怨婦半魂離。。無可奈

(雙句) 珍重一聲人去矣。(播戰鼓衣邊下介)

(雙卿哭相思介)

(兩清兵之刀斧手，甲刀斧拈皮鞭，乙刀斧拈麻繩，食住哭相思上，乙斧先丰友埋綁雙卿介)

(甲刀斧打雙卿幾鞭介口古) 賀雙卿，如果你唔想身葬皮鞭，快的供出紀淮良嘅去處。(打介)

(雙卿口古) 我與紀淮良並不相識，就算你打死我都唔知。。

(甲兵再打卿介)

(播戰古介)

(乙刀斧口白) 衣衣，係唔係明朝嘅救兵呀，我地避開一陣先，處處都封鎖晒叻(衣邊甲乙斧下介)

(夢湘解綁口古) 雙卿姐，而家處處都封鎖叻，我地三個人唯有門前等死。

(雙卿口古) 希望碰到有熟識嘅明朝兵將，我不顧一切都要救此手上孩兒。。

(急急丰，手下，堂旦拈明字旗先上介)

(小軍拈車，李蘭香坐車，李棲鳳披大靠拈大刀上，穿三角執架，送嫂排場，棲鳳斷頭扎架介武西廂)

迷茫血淚濡，金甌經殘舉雄師，力已不支(雙)(轉慢板)送妹夜行千里。(斷頭扎架介)

(蘭香慢板下句)劫後春蛾，也知憂懷國恨，恨難作巾幗娥媚。含淚望楊州，一灑思親淚，望天把

爹娘護庇。

(棲鳳口古)拋刀手下接介)二妹，你去個便桃花林坐下先，我經過細梅琴苑，我又忽然想起一件心

事。

(蘭香口古)唉，好啦，我都要休息吓叻，疲勞三百里，我嘅力弱已不支。(埋什邊台口石櫈坐下

介)

(棲鳳埋衣琴苑門口重一才與雙卿關目介)

(蘭香望見微嘆笑白)哦，原來阿哥變亂中都不忘女人嘅

(雙卿一才口古)棲鳳，你快的救我出火網啦，否則我就難逃一死。

(棲鳳口古) 雙卿，我一心來搵你，別後三年，我說不盡相思之苦，而且在亂世中，應該一切未了嘅都要了晒叻，我呢向你卜問婚期。。

(雙卿一才口古) 吓，棲鳳我我我已經替人生子。

(棲鳳一才口古) 哦，雙卿，原來你負我，係咁就有你時我有我叻，到呢時候如果我重照顧你，人地會笑我太過痴愚。。

(夢湘口古) 將軍，唔駛咁灰心嘅，阿雙卿姐個男仔已經有咗叻，話唔定死咗叻，如果你肯准佢挽油瓶呢，我包管呀雙卿肯嫁你

(雙卿一才茅介)

(棲鳳口古) 雙卿，我同情你失足，如果你肯嫁我嘅，我樂於接納，因為父母都垂垂老矣，我要趕快了卻孝思。。

(雙卿先丰茶拉夢湘台口口古) 阿湘，做乜挽油瓶你都敢講架，烈女從一而終，焉能心懷二志。

(夢湘口古) 你都傻嘅，事緊馬行田咁嗎，講多都無謂，過橋要緊，最多洞房個晚，你哂吓個肚比佢睇，佢將來就會仗義還妻嘅叻，點頭答應啦，莫再猶疑。

(雙卿無奈點頭白) 好啦棲鳳(抱住斗官介)

(棲鳳拉雙台口花下句) 你嘅手上兒自應說為我有，莫比堂前父母知。。(白) 阿妹你埋呢(花)呢一位賀雙卿蓋世才華，乃係你嘅未來嫂氏。

(蘭香檢衽白) 素仰阿嫂(花下句) 未成婚，相逢亂世，何以手抱孩兒。。我地詩禮家傳，難怪我含羞問此是誰家之子。

(棲鳳口古) 駛乜問啫，梗係我嘅啦嗎，我同佢識咗三年，我一得閒就走呢呢處溫柔鄉住。

(蘭香喜介口古) 唉吔好咯好咯，我阿爹阿媽都抱孫心切，我一見到面啫，我就話比佢知。。

(棲鳳口古) 阿妹你同阿嫂先行，我隨後至。

(蘭香口古) 阿嫂你坐車啦，我傍架車行就得叻，你係嫂，我都曉得分上下尊卑。。

(雙卿上車，夢湘蘭香急急丰衣邊下介)

(棲鳳快點下句) 雷鳴金古再奔馳。何幸草橋逢知己。(携刀馬蕩子完欲下介)

(內場多貝爾喝白) 哪裏走，哪裏走(力力古拈長矛上攔住介，甲乙刀斧四清兵拈清字旗同上介)

(貝爾口古) 睚寧侯，如果你唔屈膝投降，你便會受矛刺死。

(棲鳳口古) 多貝爾，我欲投降，獨惜金刀未准，大丈夫拼教馬革裹屍。(一批介)

(貝爾口古) 睚寧侯，如果你肯投降，我特許你保存明室衣冠，更有多多賞賜。(介)

(棲鳳口古) 冲冠一怒我要把你刀下鋤誅。

(貝爾挑開花下句) 你抬頭把草橋一望，包管你魄散魂飛。今時一髮繫千鈞，我問你想做忠臣(一

才) 抑或做孝子。(喝白) 帶

(甲乙刀斧手押李帆李老夫人上橋欲殺介)

(貝爾白) 李將軍，你且抬頭看看這是誰人

（棲鳳重一才，拋刀下馬反身完哭相思跪埋介）

（李帆口古）畜牲，男兒當為國犧牲，但作忠臣羞為孝子，縱有斷頭之日，不能有降服之時。。

（棲鳳先丰友搶回金刀快點下句）嚴親責命豈能辭。。重舉金刀求一死。（先丰友介）

（貝爾搭住快點下句）金刀無力枉奔馳。。（花）傳令將此老人亂鞭死。

（甲刀斧持鞭打李帆介，棲鳳重一才拋刀反身完再跪埋哭相思介）

（老夫人口古）乖仔，你當念身從何處來，萬不能讓白髮蒼蒼亂鞭打死，投降啦，不可再猶疑。。

（棲鳳京叫白）（鑼鼓頭快慢板下句）魄已離，魂已散，當救父慈。。（白杭）欲想我投降，能否約三

事，第一不改明室嘅衣冠，第二不問行政事，第三門第要保存，不作清廷嘅官吏（一才快慢板

下句）倘不從，惟一死，望你完成我心志。

（貝爾長句花下句）好容易（雙）一生重才明大義，只要將軍豎降旗，又要收沒全城嘅兵器，一於繳械在當時。。此後你都以禮相看，尊重你擎天一柱。（白）人來收沒全城嘅兵器，此後割雞都唔

比用刀，放人（明朝兵將之兵器由清兵收）

（老夫人扶李帆下橋花下句）謝督帥逾情格外，我地都要共返鄉居。。（白）你唔好問天下事叻仔

（棲鳳花下句）呀媽，我地番去趕速成婚，避世佯狂退享天倫樂趣。（扶兩老衣邊下介）（明兵解散介

下介）

（貝爾口古）吠，重有一個史可法嘅幕府紀淮良，此人萬難寬恕。多爾袞元帥五申三令要此人萬段碎屍。。（花下句）功成一戰，火海飄揚勝字旗。。（慢長才賣身形下）

（落幕）

(第二場) (揚州寺門停棺孝堂景)

衣什為東西廂門，什邊佛龕，正面停棺香燭，上掛橫匾寫(浩氣長存)兩邊對聯寫(明室天下今何在，清兵入寇國已亡)衣邊台口橫枱椅，枱上擺佛燈一支

白披風

(四梅香掛帛企幕點香燭介)

(排子頭起幕)

(蝶痕白杭)昨夜紅，今晚白，怪不得話人到極歡成永恨，少爺昨晚正成婚，老爺泉台已飲恨，殉國已存忠，開喪還未敢，留夜寄棺在寺門，等待親朋來吊問，個位新少奶，真係奇得很，未曾結婚已有兒，聞說腹中懷了孕，或者少爺在揚州，觀喜拈花和惹粉，先已賦同居，然後諧合卷，入門已不祥，將來佢地位都唔安穩(督梅香打掃介)

(譜子雙卿披麻帶孝抱斗官亦披麻帶孝上介一才詩白)獨對青燈懷故友，每看黃土念孤臣(長花下句)

手上抱嬌兒，腹中懷血胤，鳳泊離鸞何須問，幸得李郎仗義毀婚盟，雲板一敲除綉綿，身着麻衣滿淚痕，怨婦縱能勉強存責任，呢一個無辜愛子，又點能披麻帶孝咁做住李家人。。堪憐假鳳慰虛鸞，一切都為有含糊帶混。（噯斗官介）

（棲鳳披麻帶孝衣邊上，擰實面口偷聽介）

（雙卿白）我無端端咁就披麻着孝叻，李棲鳳佢仗義還妻，我咁做法都好啱，不過呢個仔至無辜吖，紀門嘅骨肉，同佢地李家披麻着孝有乜好呢，保佑佢呀爹而家平平安安至好咋，假如有乜不測，呢個意頭就真係曳叻（暗中垂淚介）

（棲鳳一才白）雙卿（忿忿然介）

（雙卿一才發覺口古）棲鳳，你呀，我同你商量一下（介）我就好願意同你披麻帶孝，不過我唔想我個仔咁樣，你話開喪嘅時候撞啱熟人，你叫我如何避隱呢。

（棲鳳一才白不歡介）雙卿我為你（一才）你好應該為番下我（一才）一家大小三百人，除咗你同我

之外，有邊一個知道我地係虛驚假鳳，有邊個唔當我地係真夫婦（一才）你手抱呢一個就等如係我地李門嘅嫡孫，如果嫡孫都唔着孝嘅，做乜易嚇死埋個老年人呀。

（雙卿口古）棲鳳，我肯打扮成咁嘅樣已經好對得你住叻，我個仔唔能夠咁樣嘅，我聽人地講戴過呢野好唔利是架，你何必長令我心弦驚震。

（棲鳳更不歡慢的悲憤口古）雙卿，我阿媽幾十歲，到咗呢個最刺激嘅時候（火介）如果佢知道個新抱又係假嘅（一才）個孫又係假嘅（一才）佢重有唔跟埋我阿爹瞞直咩（忍氣強笑介）雙卿係咁意啦，最多七旬之後，買的碌柚葉煲水同阿蘇蝦洗淨個身。

（雙卿白）棲鳳唔好喇（花下句）到底佢都係紀門骨肉，何苦要佢麻帛纏身。懷鳳友，借取眼前兒，惟有暗裏牽衣重哀懇。（牽衣介白）唔好喇棲鳳

（棲鳳慢的悲憤突然打雙卿兩巴推開火介長二王下句）眼中怒火已焚心（一才）淚眼看花花太狠（一才）早知緣慳福薄，何必枉作有心人，燭影搖紅你知否我嘅淚難忍，拈杯惟強笑，酸淚滿衣襟，

怪不得話仗義由來，搏得兩字傻夾笨（一才）此際盈眶皆紅淚，你刺破劫後心。究竟是假鳳虛凰，有甚麼真情愛忱。（包一才收火介白）點都好啦雙卿（一才）你歡喜點就點啦雙卿（一才）假嘅就原本係冇意思，勉強就無謂，你不如扯啦扯啦，理得我阿媽生又好，死又好，你根本係我嘅假夫人，就算我冚家劇你都唔會流眼淚嘅（火介）你扯啦（抽咽）

（雙卿慢的的扑埋攬棲鳳乙反長二王下句）怕聽斷腸音，更未敢投懷舒慰問，雙卿人非鐵石，我是一個有才人，君非福薄，奴不幸，你是擎天唯一柱，我不過是殘花敗柳身，今夕我母子兩人，代你全責任，你何苦搥心哭叫，知否聽者難堪。未知假到何日何年，至得共你脫離名份。（白）唔好咁傷心叻鳳哥，點都好啦，不過我係處唔知等到幾時至扯得啫

（兩梅香，蘭香披麻着孝扶老夫人衣邊卸上偷聽介）

（棲鳳口古）雙卿，駛幾耐吖，等我阿媽死咗之後，一切一切都可以解決啦，就算你無可忍時還須忍。

（蘭香一才愕然介）

(雙卿口古) 唉，我點都唔會望亞奶奶死，就算望佢死佢都唔係死得咁易㗎，我聽見的丫環話，佢一餐食三四碗飯，我地做後生嘅，都有佢咁精神。

(夫人一才愕然介)

(棲鳳口古) 唉，阿媽死起上呢就容易嘅啫，佢有心臟病，佢天國魂歸重易過合眼瞓。

(雙卿口古) 哦，原來你阿媽有心臟病嘅，咁我就應該吞聲惡忍以謝郎君。

(老夫人一才白) 唉吔，阿家嫂你為乜野事幹要望我死呀(重一才)

(棲鳳雙卿食住重一才驚覺魂飛魄散介)

(蘭香白) 阿哥阿嫂，你地為乜事幹要望阿媽死啫(長花下句) 摘取菩提葉，窗外有慈雲，殿前私語

已微聞，兄長做人無孝感，反令蘭香血淚涔，父死蓋棺悲難忍，試問你緣何咒母，枉你係一個明末遺臣。姑斷腸，嫂斷腸，點解阿嫂你重咁有閒心，將阿媽死期卜問。

(老夫人白) 家嫂，你為乜野事幹要望我死㗎(花下句) 我不怪你心存狼毒，因為我素來敬重你係一

位女才人。。入門翁死已不祥，何以更望家姑死期近。（追問介）

（蘭香白）唔好咁激氣叻，等我擔張櫓比你坐啦（介）

（雙卿跪下花下句）我呢個劫後人得取婆婆福蔭，焉敢有狼毒存心。。朝焚香，晚焚香，祝你福壽康

寧無缺憾。

（蘭香譏笑（三百本·正容）白）唔係嘅阿嫂，咪話我呢個姑仔迫問你，我明明聽住你話望阿媽死嘅，

為乜野事幹你而家又唔坦白講呢，一個人講得出就唔怕認（一才）唔敢認就千祈唔好講（一才

介）

（棲鳳茅介一才大聲白）係係係，冇錯，係阿雙卿望我地阿媽死（重一才）

（老夫人食重一才瞪大眼問白）乜野事幹

（棲鳳花下）賀雙卿（一才）翁死圖殉國（一才）只怕阿媽你侍奉無人。。佢流血淚，望阿媽你終老

百年（一才）佢便玉殞香消尋自刎。

(老夫人重一才白) 唉吔好新抱 (雙) 我地李門有幸咯 (拜天地介)

(蘭香破涕為笑走埋白) 你嘅手中兒已為紀門傳後代，我不知阿嫂你抱負咁驚人。重揖拜，拜在嫂

跟前，佩服你節義高人一等。(姑嫂二人禮讓介)

(棲鳳在旁抹汗介)

(老夫人花下句) 得個孝順女兒，好新抱，老人泉下亦笑偷含。快把喪禮鋪排，好等宗親吊問。

(帥牌，魯松，魯岳二父老同上入介)

(魯松口古) 聞得世兄殉國存，我地都與有榮焉，望阿嫂節哀免多悲感。

(夫人口古) 我地自己人憑吊一番就算數叻，那香香香，我幾十歲唔企得呀，擔張橈去靈前比我坐，

你地做仔，做女，做新抱，做孫嘅，應該跪埋靈前以謝來賓。

(云云，魯松魯岳二父老分邊恭立介)

(蘭香擔橈靈前什邊，夫人坐下，然後跪下介)

(棲鳳雙卿抱斗官跪靈前之衣邊介)

(蝶痕拈香一炷企衣邊台口橫枱旁介)

(云云鑼鼓收掘，棲鳳蘭香雙卿放聲喊介)

(蘭香一才白) 阿嫂，阿侄哥瞓咗咩，點解總唔聽見佢喊架，都有乜天性嘅

(雙卿白) 哦二姑娘，你想蘇蝦喊，容乜易啫(用手撼斗官，然後假眼淚喊介) 唉，老爺，唉，你殉

國存忠成大任，唉，待等蘇蝦長大，做你嘅繼後人呀唉(向棲鳳駛蘭香苦口苦面介)(棲鳳點頭

作滿意介)

(蘭香亦放聲喊介) 唉，爹罷爹，唉，我決不任罡風捲劫殘脂粉呀，罷爹呀，唉，待等慈靈過後，我

都身臨泉下伴亡魂呀喇唉

(老夫人喊介) 唉，夫罷夫呀主呀唉

(魯松白) 阿嫂你幾十歲唔好喊咁多叻，留番比的仔女喊下罷啦，就算喊茶喊飯都唔駛你老人家

(內場白) (一才介) 客到 (坐堂吹)

(淮良白膠片漢裝巾仔拈祭帳上台口長花下句) 血淚已凝眸，我呢雙火網驚鴻應遠隱，今宵古寺又重臨，七十歲人殉劫運，帶得兩行清淚，去哭祭個個殉國忠臣。。經已忘孽債，休記眼前愁，肅

整衣冠為吊問。(棚面玩哭皇天掃衣完入介，向靈前三拜再向家屬一拜，然後埋衣邊蝶痕手上取

香一炷插於靈前介)

(重一才雙卿抬頭與淮良關目慢的的介)

(淮良食住慢的的見狀黯然行開台口介)

(雙卿起身食住跟至台口介)

(蘭香食住慢的的見狀覺奇，爬起埋衣邊叫棲鳳注意雙卿介)

(雙卿苦笑口古) 淮良，我我我我真係估唔到响呢處見番你叻，我而家對住你，真係笑又唔忍，喊

又唔敢。

(淮良尖酸口古) 李家嫂，你尊重的至好，你而家都披麻戴孝叻，你應該跪响處至啱，你唔應該郁手郁腳，搵住我呢個陌生人。。

(雙卿情急介拉開細聲口古) 淮良，我抱住個蘇蝦仔係你架，你認得嗎，唉吔，你要聽我講，唔好一見我面就咁尖酸，就咁搵爭。得架

(淮良更尖酸口古) 我認得，唔通自己骨肉都唔認得咩，蘇蝦仔都算係有福咯，挽油瓶咁輕容易有資格披麻戴孝咩，我而家安樂叻，你兩仔乜有人安置喇嘍，我番去揀定個好日子然後至靜靜還神。。

(雙卿一才愕然欲解釋介)

(棲鳳口古) 紀先生，原來你認識賀雙卿，雙卿就我嘅新夫人叻。。

(蘭香口古) 阿哥，就算阿嫂同亞紀先生係新相識又好，係舊相識又好，而家呢個開喪時呀，就算有交情嘅，都唔應該執手重溫。。

(老夫人口古) 係囉家嫂，我正話見你喊都喊得勉強過人嘅叻，如果你唔歡喜跪响孝幃之內，你可以

早的番入去瞓叻。

(魯松口古) 係囉，呢位新嫂的所為點解咁唔好架，我睇住佢點口水來作假眼淚，係呢侄哥，淮良你
到底同佢有乜遠戚近親呀。。

(雙卿花下句) 紀淮良是我揚州故友，我曾經共佢(一才向棲鳳關目介)

(棲鳳發茅關目介)

(雙卿會意唱花) 我曾經共佢煮酒論詩文。。我呢個手中兒，亦係佢(一才)

(棲鳳食住一才向雙卿哀懇狀介)

(雙卿會意) 亦係佢他日嘅門生，待佢傳受經倫學問。

(淮良花下句) 今番莫問從前事，待吾灑淚祭英魂。。我少讀聖人書(一才) 長握天下權，未必會心

存非份。

(地，法師衣上白) 齋飯經已準備多時，請各位後苑用膳

(棲鳳口古)係囉，雙卿，而家經已半夜叻，我相信都有乜野人呢叻，你不如抱埋蘇蝦入去食飯先啦，我睇你都疲勞過甚。

(蘭香口古)阿媽，不如我都扶你入去係咁意都食番幾啖吖，我地的後生嘅都可以唔食，你幾十歲斷不能稍有餓親。。

(老夫人口古)係囉，不如大家入去食罷啦，阿鳳你要入去招呼下人至得嘅(一才仄才)係呢紀先生，點解你唔同埋入去呀，我睇你傻咗咁企响處，好似滿懷悲感。

(淮良苦笑介口古)伯母，我唔入去叻，我要單獨一個响靈前佇立，默念吓世伯對於明朝所立嘅汗馬功勳。。

(老夫人，蘭香，梅香，蝶痕什邊西廂卸下介)

(棲鳳雙卿抱斗官，魯松魯岳二父老衣邊東廂卸下介)

(淮良見各人俱散，則扭熄衣邊之佛燈，全場暗光，然後拉橈坐於正面台口頽然花下句)屈結滿懷無

可訴，斷腸更藉夜深沉。。橫波已是李家兒（一才）雙卿卻已睡落人衾枕。（白）係咁嘅叻（雙）女子無才便是德，有才冇兒有幾多個能夠從一而終（介）唔好想咁多叻，等我係靈前合一陣，希望世伯精靈所寄，有所吩咐啫（打喊牢凭椅而睡介）

（三更云云，雙卿抱斗官，衣邊閃縮上走埋細聲叫白）淮良，淮良（淮良不醒介）口古）吓，咁樣都瞓得着嘅，總唔會掛住吓我嘅，蘇蝦，等我揸住你個拳頭仔呢打醒你爸爸至得，佢做人可算得都有乜野責任。（揸斗官手打良）

（淮良醒介重一才慢的的一巴掌打雙卿，再一巴打斗官介）（口古）算叻算叻，你兩隻野重呢見我做乜野呀，雙卿，你唔好以為我重留戀你，我過當如逢場作興啫，請你唔好披麻戴孝向我賣銷魂叻。。

（雙卿一才憤然介口古）鬧唔怪得你鬧，不過你都要等我講完講罷至鬧得架，一見面就一巴兩巴咁算點呢，你尊重吓我呢個賀雙卿，唔係慣於將衫尾搵。架（走埋介）

(淮良重一才一掌打開雙卿跌地介，大笛斗官叫介)

(雙卿攬斗官跌地白) 唉吔，咪，蘇蝦唔好驚(扭耳扭鼻)

(淮良憤然口古) 而家唔需要你解釋，更唔準你開口，重駛你解釋嘅咩，我都係一個聰明人。(反

線中板下句) 含淚痛握拳，一揮無情嘅慧劍，斷碎了海誓山盟。我不怪你再重婚，我怪你作

秋蟬，曳了殘聲，躲入人呀人衾枕。血淚兩交揮，忍見此紀門骨肉，披麻移作李家人。你若

有血肉天良，你若有皎潔靈魂，何至有如斯胡混。別人喪，你兩仔乸在靈前跪拜，怎不令我憤

向苦中生。(花) 無可怨，怨今後我無面見先人，不覺搥心悲憤。

(雙卿抱斗官撲埋攬住良苦笑白) 淮良，我個心雖然係苦，但係我個面上都難掩飾有多笑容，聽見講

呢番說話，原來你個心重係好愛我嘅

(蘭香拈立燭衣邊卸上靈旁偷看介)

(淮良憤然大聲白) 係呀，我好愛你呀(介) 我愛得你好交關呀(介) 我愛你會披麻(一才) 又會着

孝（一才）

（蘭香一才強烈反應欲發作又忍住走埋拈油燈之較剪揸在手中介）

（雙卿花下句）人間多少荒唐事，望郎拭淚莫傷心。亂世人悲亂世情，且待我一訴別離衷隱。（白）

淮良，原本我呢……

（蘭香白）阿嫂（口古）我唔准你起身，我要你伏係佢膝頭上便，假如你唔聽我嘅指揮，我就會將你無情手刃。（狂叫）阿媽，阿哥，各位宗親父老，你地快的出呢睇吓，睇吓我呢個所謂阿嫂响開

喪嘅時候都去勾人。（叫白）阿媽阿哥快的出呢

（力力古，棲鳳老夫人魯松魯岳二父老蝶痕食住分邊上）

（梅香跟眾人上介）

（棲鳳見狀會意先丰鉞執起雙卿故作怒容一巴兩巴）（打雙卿跌開衣邊台口介）

（蝶痕連隨走埋去抱起斗官介）

(老夫人悲咽介口古) 唉吔家嫂，如果唔係我親眼見我都唔會咁心痛，家公正話死咗，屍骨都未寒，點解做新抱嘅咁快就做出牆紅杏。(髑至震介)

(蘭香口古) 阿媽你坐低坐低，就算阿嫂失德，都唔駛你老人家處置嘅(火介) 佢眼前有丈夫(一才)
左右有父老(一才) 點都唔會咁輕易將佢放過嘅，就算阿哥唔念在爸爸嘅體面(一才) 各位父老都會念在阿爹一生忠義，唔肯放過呢個淫賤婦人。。

(淮良口古) 伯母，二小姐，呢件野完全唔關我事，就落花有意隨流水，流水亦無心戀呢個殘脂粉。
(毫不着意行開什邊台口介)

(魯松口古) 呢責任應該由佢丈夫負起嘅，李棲鳳，枉你為一品官，處理天下事，在呢個咁嘅時候，你都唔衝冠一怒，去拷問你個枕邊人。。

(棲鳳重一才慢慢的內心關目一才頓足先丰鉞扑埋拈木棒執雙卿台口一打兩打跌地亂棒打完台口向
雙卿關目悲咽長花下句) 棒打似無情，休怪吾兇狠，我呼喝聲聲你唔使震，低徊休望我慈云(細

聲介）假作無情為驅擯，望卿重戀舊時人（大聲）覆水難收，何必重哀懇，呢一枝無情鐵棒，
代作警淫針。你離佛苑（一才）莫再返家園，趁今晚脫離名份。（故意打兩棒火介）白）你扯
（一才）你扯（一才）（肉緊細聲介）你重唔乘勢扯

（雙卿會意介花下句）謝君不殺堂前婦，下堂拜謝你深恩。拭眼淚，再抬頭，投向玉郎為倚凭。（急
走埋淮良處拉住淮良白）淮良扯叻，我同你番去叻，人地都唔要我叻

（淮良切齒白）哦人地唔愛你，你就走番呢我處係嗎（一巴兩巴打卿介白杭）好馬不再回頭，隔夜素
馨要搵厘秤戥（一才）人唔要我亦唔恨，何苦要婉轉投懷添憤恨，你從今不作紀家人，我決不
回頭將你問，一怒走天涯，永不在情場再廝混。（包一才頓足狂怒下）

（雙卿欲追下介）

（蘭香阻攔住白）喂，唔好賤格得咁緊要喇亞嫂

（雙卿重一才沉花下句）唉吔吔，左右兩兩人皆垂罵（仄才關目介）欲訴衷情更未能

(蘭香火介白) 嫂嫂，你行開呢，等我數吓你(長句花下句) 兄長太昏庸，難消仇與恨，我自少秉承
慈父訓，細查三代，失德更無人，長嫂何堪為紅杏，小姑亦愧無面目對親朋，憤怒成狂，天下
女兒都被一人弄至不堪聞問。(打卿幾巴頓足掩面羞下衣邊介)

(雙卿慢的的捧面作苦介)

(老夫人白) 鳳，趕佢扯啦，重比佢企响處造乜野呀

(棲鳳故意火介白) 得叻，扯啦，你重唔扯企向處做乜野呀(先丰鉞拉卿開台口細聲口古) 你唔趁機
會，我都知道阿淮良慝响黃石磯旁邊個個石岩裏便，你靜靜地將佢搵啦。

(雙卿重一才如夢初醒介口古) 哦，我而家扯叻，保重叻奶奶，保重叻棲鳳(介) 係呢蝶痕，抱番波
仔比我啦，呢隻淒涼燕從今後再不回林。。

(老夫人一才白) 乜話，比番波仔比你(先丰鉞撲埋搶斗官攬實介口古) 你扯就還你扯，呢個係李門
骨肉，以後都唔關你份。

(雙卿一才口古) 唉吔，奶奶，呢個仔唔係阿鳳架(一才)

(老夫人食住一本跌椅怒至震介問白) 吓，你講乜野

(棲鳳口古半句) 係係係，呢個仔係我嘅，就算離咗婚，個仔都應該歸番比我吖，阿媽夜(介) 雙卿

雙卿，你講話要小心呀，千祈唔好嚇死我個娘親。(暗拜介)

(雙卿搥心頓足作難為介)

(老夫人花下句) 莫比佢污辱佛門清靜地，莫比佢玷辱泉下英魂。叫親朋，望你地用掘頭掃把，將

佢來逐攞。

(眾人哄動白) 唔趕唔得叻

(魯松先丰鉞埋取掃把亂拍卿介)

(蝶痕卸下衣邊介)

(雙卿狂叫白) 咁樣我唔扯得嘅(跪下反線中板) 泣血再求憐，我不過為酬恩義，未忍一語碎慈雲。

願作燕兒飄，怎能乳燕離懷，唯望夫人憐憫。不若待我撫孩兒，莫問是誰家孽種，何必令孤燕失群。。（花）重泣血，膝下哀啼，望你還我懷中血胤。（白）夫人，奶奶，你當如係做好心，俾番個仔我啦

（老夫人火白）唔得，新抱係人家女，少一個幾咁唔閒，孫始終係我嘅孫，冇咗佢我就即刻死嘅叻，鳳你重唔趕佢

（棲鳳故意趕火介白）雙卿開呢，等我點醒吓你（介）（台口口古）雙卿，我都敢激你受咗委屈，呢顧存我阿媽條命，對於呢個孩兒，我希望你就暫時唔好再問叻。（大聲）你至多一年番呢睇佢一次嘅啫（細聲）等阿媽死左之後，我然至有骨肉還人。。

（雙卿無奈點頭花下句）受人恩惠千年記，萬般無奈背兒行。。縱使准我一年一度燕歸來，恐怕淮良難答允。

（棲鳳細聲白）你即管將呢個情形番去同佢解釋吓，如果佢真係唔得嘅時候，你至靜靜地呢搵我啦（故

意火介）你扯啦，冇商量

（雙卿白）好啦，奶奶我扯叻，比我埋去錫啖個仔得唔得呀

（老夫人白）唔得，你埋呢，容乜易比你搶番架，喲，我嚟吩咐你呀，以後雖然准你一年番嚟一次，

但係唔准你認係佢老母（一才）閒日唔准你番嚟，係八月十五至准你番呢嘅啫

（雙卿一才頓足哭相思）

（棲鳳食住哭相思故意火介將雙卿趕出門介）

（雙卿頓足快點下句）漫天風雪訪前盟。乳燕離懷心耿耿。（頓足下介）

（棲鳳白）阿媽唔咁傷心叻，比呀波仔我抱吓罷啦（介）

（沖頭蝶痕衣邊上白）唉吔，夫人少爺，阿二小姐係西廂自殺呀

（眾人一才白驚荒介）吓，真唔真呀

（力力古蘭香散髮血衣褪筒劍插胸膛仆上介）

（棲鳳扶住介口古）二妹，你也野事幹犧牲，偷拔龍泉自刎。（追問介）

（老夫人口古）唉吔乖女到底你有乜野不了之事，吖，你是否為情為愛自喪其身。

（蘭香慢的的悲咽白）阿媽，阿哥，我之死，並不是為情（一才）我之死並不是為愛（一才）我今之

死乃是為國（一才）我並無不了之事，我只恨阿哥降清失節（一才）我係一個一個一個（禿頭

中板）烈女在垂亡，叮嚀重囑咐，惟望以血醒痴魂。我父保明室，建立幾許汗馬功勞，我地

應要繼承佢嘅責任。鐵馬破中原，縱不能把山河光復，亦不能失節去造降臣。（轉快七字清）

十夜屠城彌天恨。三千里路盡冤魂。一死旦求兄振奮。望能煉石補天沉。（跪地花）望兄長

鑒領微誠，負起救亡重任。（白）阿哥，你要記住我呢句說話，縱然間你有機會，你抱住個侄哥，

將來都叫佢反清復明，唔係就算二妹死，都死唔眼閉，嘅呀哥（一路講一路跪埋迫介）

（棲鳳重一才慢的的抱起斗官花下句）妹呀，我若不能把明室光復（一才）何以對你呢個烈女貞魂。

當頭一棒醒愚蒙，且容我把時機候等。（白）阿妹，我誓願，我總有一日高舉義旗（一才）就算

我做唔到，我都重有呢個仔（一才改口介）我都重有呢個蘇蝦仔，阿妹你放心啦，我好多謝你
以死呢勸諫我（抱斗官開邊跪介）

（蘭香三搭箭狂笑白）我而家安樂叻，我扯叻媽，我扯叻哥（死介）

（眾人同哭雙相介）

（棲鳳起身攬實斗官花下句）手抱孩兒重泣嘆，國仇家恨豈無根。。

（落幕）

(第三場) (黃石磯石岩內外景) (雪景)

衣邊為石岩，石岩內一几，一桌，一床，桌上有燈及書，什邊亦為石岩，但有疏林大樹，石岩上前為刑場，底景為黃石江，對江為清兵遠營景

(全場緣燈)

(淮良(雪衣) 坐幕秉燭觀書介)

(排子頭一句作上句開幕)(戰笳號角聲)

(淮良重一才慢慢的擲書而起一才詩白) 獨處山岩對遠營。隱約微聞杜宇聲。戰笳驚破愁人夢。為誰悲泣到天明。(乙反長花下句) 迷茫風雪夜，戰馬慘悲鳴，傷心如我淚盈盈，灑淚非關殘夢醒，何堪草木兩皆兵，眼見半壁山河，一切無所剩，只剩得一點劫餘酸淚，一縷憂國心情。誰伴此火網遺臣，只有殘月疏星，照我孤零獨影。(口白)(攝譜子) 我嘅一生已經盡了叻，慳埋係黃石磯，過得一日得一日，過得一時得一時，希望保存呢條殘餘生命，能夠為明室再效微

力（介）唉，真料唔到，多貝爾，今朝又係隔江安營紮寨，我睇呢處非係我久居之所（介）不過唔怕，連日暴寒，岩前積雪，已經有三尺幾厚，只要唔比佢足跡可查，佢點都唔會發現我慳埋响呢處嘅（埋秉燭看書介）（細聲讀正氣歌）

（燭邊大風雪，朔風怒吼，棚頂落雪花介）（大云云）

（雙卿（紅小漢裝紅雪襖，拈一小紅燈籠）作閃閃縮縮上介）

（鑼邊大風雪，朔風怒吼，雙卿之燈籠綁線扯上棚頂介）

（雙卿跌地台口再掙扎起身，長花下句）風捲小紅燈，雪裏重奔命，冷月不憐纖瘦影，朔風一怒，逐流螢，積雪彌漫，難把山岩認，急見殘燈影，腸斷微聞朗誦聲。未相見，暗驚魂，偷把衣衫一整。（台口白）想落，又係唔怪得佢黝嘅，自己個老婆，同人地披麻戴孝，比你做着佢呀，你都黝呀（介）所以我呢次呢見佢，辛辛苦苦都搵件紅衫着起（介）你估我又唔細膩咩，不過無可奈何嘅啫（一步一步行埋白）淮良

(淮良嚇一跳欲避望真介白) 乜你呀 (怒不睬介)

(雙卿笑介白) 淮良，今晚正係風雪故人來叻，做乜番呢你都唔出呢迎接我呀，扶我番入去啦 (欲入介)

(淮良一才白) 唉吔，你唔好呢咪整污糟晒我的地方，我寧願出呢見你叻 (介) 你同我重有乜野好講
吖 (包一才憤然企立介)

(雙卿笑介口古) 淮良，今晚嘅雙卿，已經唔同咗昨日個雙卿叻，咁嬲做乜呀，望吓我吖 (介) 昨日
我嘅戴孝披麻，今日我經已紅裳蔽體，我望你重把舊時人認。

(淮良重一才慢慢的搖頭冷笑介口古) 唔怪得人地話的女人，多數都係五時花六時變叻，歡喜就穿紅，
歡喜就着吓白，呢的我唔干涉你，但係你歡喜就嫁吓人，歡喜就番呢見吓我，咁就唔得叻賀雙
卿。。。(撞火介)

(雙卿苦笑介白) 淮良嬲遲一陣，等我講比你聽喇 (口古) 着白我係無可奈何而着嘅啫，穿紅呢我就

有心打扮成咁嘅，唉，你呢雙照命紅鸞，點解點極你都唔醒呀。

(淮良白) 你都當我係死嘅，着就無可奈而着，梗係無可奈何啦(口古向台口) 你問吓人，有邊個願披麻戴孝架，貪利是咩，你做人新抱唔披就唔得叻(介) 唉，唔好講咁多叻，我同你已經恩情

兩絕，你何苦午夜再挑情。。(白) 我個仔呢

(雙卿白) 你個仔，阿波仔，比咗人叻

(淮良重一才白) 吓

(雙卿白) 比咗人地寄養吓嗎(花下句) 傷心難把嬌兒抱，驚惶難說個中情。。佢話准我一年一度燕歸來，明月當頭仍可將仔認。(白) 佢話准我一年一度番去睇阿波仔一次嘞，良哥，你同唔同意啫，唔怕嘅喇，波仔始終都係我同你嘅

(淮良氣結白) 吓，難為你問得出口，我同唔同意添(花下句) 欲打已無掌力，掩耳怕聞你呢種淫蕩聲。。他人婦，何必再來，咪當我痴迷未醒。

(雙卿白) 乜野他人婦啫，我幾時有嫁到佢呀

(淮良白) 吓，你有嫁到佢(介)

(雙卿白) 冇就即是冇啦，唔通冇都話有咩，講起上呢，好似一疋布咁長，喲，昨晚係古寺裏便，我啱啱想同你講嘅叻，又撞啱個小姑娘，咁就攞到攞到攞到，你都見嘅啦

(淮良白) 雙卿，好心你唔好雞釘唔斷咁叻，簡單的講，我心好急嘅吓嗎(急介)

(雙卿白) 講，我梗講，你叫我唔講都唔得吓嗎(介)呀，係喇，我行咗幾里咯，對腳都行到軟晒叻，你會唔會擔張橈比我坐响處，坐得舒舒服服講嘅啱

(淮良白) 氣結白) 蝦，重叫我擔張橈比你坐添，你真係乜野都夠膽講嘅(火介)唔擔

(雙卿白) 如果你唔擔張橈比我坐低，我條氣就唔順，就算我講極你都唔明架，你心急咋我個心就唔

係幾急啫

(淮良一才氣結晦氣先鋒鉞入擔竹椅晦氣跌於正面台口介白) 坐啦

(雙卿坐下白) 欸，昨晚你扯咗之後，咁我呢(介)係喇，我由朝到而家，一滴水都未曾入過口，至好斟杯熱茶比我，等我飲咗神經鎮定的至講

(淮良白) 噏，擔完橈又要我斟茶，你而家呢氣我，抑或呢同我解釋呀，雙卿(火介)我唔斟

(雙卿白) 唔斟就罷啦，我為你生生死死就得，你同我斟番杯茶都唔得，重有乜野好解釋吖，算叻(啾咽介)

(淮良無奈入內斟茶一杯，出介忍氣白) 飲杯茶啦賀小姐，賀才女，李夫人

(雙卿接茶飲介，作順氣狀白) 哪咁你聽住喇，良哥(中板下句) 鐵馬破揚州，我呢個草堂怨婦，難作插翼飛瓊。網中魚，本待從就義，無奈被兒啼喚醒。棲鳳護殘花，我欲借他人庇護，避過那狼虎猙獰。燭花紅，含淚未投懷，先訴盡斷腸環境。仗義李將軍，共我作虛鸞假鳳，未嘗有半點私情。(花) 老人殉國守經堂，戴孝披麻，無非酬謝李郎仁性。(白) 我地花燭之夜，就係老人殉國之時，因為要安慰個蒼蒼白髮未亡人，所以我兩仔恁不能不披麻戴孝(介) 淮良，

我仔都同你生咗叻，而家個肚裏便，都同你陀住一個（羞）成七個月叻，我重點會對你唔住呢

（介）人待我好，我應該待人更好，所以我在孝堂唔敢識穿啲

（淮良乙反二王下句）聞語已心驚，痴迷經盡醒，幾難得還妻仗義，你當永記李郎情，劫後相逢，此花仍潔淨，不禁低徊垂淚，風前再擁雙卿。所謂恩義難忘，長在我嘅心靈感銘。（白）唉，真係估唔到亞棲鳳對我咁大義（悲咽）我紀淮良（一才）都唔知有冇命嚟酬謝盛德呢

（雙卿口古）嘩，咪講埋啲的咁唔好意頭嘅說話啦，今時唔同往日嘅叻，你睇我全身都穿紅，紅即係代表吉祥，我共你永遠永遠係破窰相依為命。

（淮良口古）雙卿，紅色在亂世唔係代表吉祥，乃係代表流血（一才）只怕未溫衾枕夢，經已碧血染前庭。。

（雙卿白）唉吔，大吉利是（花下句）俗語都有話飽嘗憂患，然後至得見真情。。何以一陣陣痛切肝腸，莫非又到兒啼光景。（白）唉吔（捧腹卸下衣邊，鑼邊大風大雪風聲笳聲，燈光更陰沉介）

(淮良茅介台口白) 唔會咁快架，佢都話七個月喎(介) 唔係嘍，七星仔都有嘅嘞(花下句) 朔風捲起千層浪，飄飄風雨罩京城。斷腸之夜產嬌兒，我亦無從為救應。(襯風聲介)

(大笛斗官叫)

(淮良撲入抱斗官出台口口古) 哦，原來唔係一個七星仔，係一個七星女呢，都好都好，一個寄養係人地處，而家有番一個，都好過我與雙卿咁孤寒寂靜。

(雙卿衣邊卸出口口古) 好叻淮良，而家共你總算有仔女叻，你做爸爸嘅，應該替呢粒掌珠定個名。
(淮良口古) 雙卿，你嘅別字叫做細梅，不如呢個女叫佢做血梅罷啦，佢在屠城之後，血流遍地然後出世嘅，改個名都好有紀念性架。

(雙卿一才愕然口口古) 淮良，你開口又血，埋口又話血，我已經魂離魄蕩叻，何況心境不寧。(暈介)

(淮良扶卿埋窰內橈上坐下狂叫不醒介白) 唉吔，佢暈咗添，大概都係冷過頭，等我去後山斬的柴同

佢焙吓火就有事嘅叻（將斗官放在台上小籬內，用衫冚住出門衣邊下介）

（雙卿倚枱暈睡介，三更風雪正濃介）

（四清廷刀斧手拈燈籠，貝爾清裝雪樓掛劍拈燈籠一路照腳印上台口長句花下句）手上小紅燈，踏雪

重追認，如此荒山和峻嶺，馬不長斯鳥不鳴，綉鞋印滿朵花徑，梟雄如我亦聰明。何必火網

搜孤臣，我可以獨坐山前埋陷阱。（攝埋窰口望一望雙卿，笑介，然後坐回什邊石屯上介）

（淮良閃縮拈柴一扎在衣邊上介）

（貝爾一見淮良一才喝白）鎖

（刀斧手上前執住淮良鎖介）

（貝爾口古）紀淮良，估唔到你終於落網叻，第二個可以唔殺，你不能不殺，因係你係多爾衰最忌最

恨嘅文人，不殺你，我斷難覆命。

（淮良口古）大丈夫視死本同閒事，就我死都好過失節降清。。。

(貝爾口古) 紀先生，你想唔想知道自己死係乜野時候，死係乜野地方，駛唔駛我將你愚蒙點醒。

(淮良口古) 忠臣烈士，隨時可以死，何苦要你着意點明。。

(貝爾花下句) 你且抬頭看一看黃花岩上，幾只餓鷹等待你行刑。。殺賊不須斷頭台，我限你即時斃

命。(吆喝介白) 人來

(四刀斧手同應白) 咱

(淮良一才驚心白) 貝爾將軍，我唔係向你搖尾乞憐，不過我希望在我臨刑嘅時候，叫的刀斧手唔好

縱聲叱喝，我唔係怕死(悲咽) 我怕嘈醒呢個可憐怨婦啫(向貝爾揖拜介)

(貝爾白) 做得，我一生愛才若渴，我無可奈何至殺你嘅啫，我素來敬仰先生，係揚州第一個文人，

請便請便，你乜野說話即管向個婦人吩咐啦

(淮良悲咽白) 我唔忍心嘈醒佢，我望佢幾眼就算叻(花下句) 死別生離無一語，彌留未敢放悲聲。。

待我微呵錫(介) 一步一回頭，默祝雙卿，我死後你能安定。

(貝爾細聲吆喝介，雁兒落，刀斧手網綁淮良拉上什邊山路卸下什邊介，貝爾仍坐回台口石屯上介)
(鑼邊風聲暗燈再開幻燈打淮良在天幕受刑掙扎介)(刀斧手舉刀作狀介)(用電咪將淮良聲音播出台口)

(雙卿食住淮良播音慢慢醒作心靈如有所感受介)

(淮良什邊內場向咪播音白用寶子托介)雙卿，雙卿，我而家死叻，你唔駛傷心，你唔好流淚，孟曰成仁，孔曰取義，我到今日，才不負我苦讀聖人書，更無愧於國家民族，雙卿雙卿，你比心機揍大呢對仔女啦，你記住所謂生男，當為明室忠，生女，當為明室死(一才)雙卿雙卿，一切嘅責任，都係你身上叻，你比心機做人啦雙卿

(早雷一聲天幕上之淮良被斬介)食住大笛斗官叫)

(雙卿抱斗官瘋狂出門狂叫白)淮良，淮良，淮良，淮良

(二刀斧手捧人頭什邊上，食住此介口呈上人頭與貝爾介)

(雙卿狂叫) 淮良，淮良，淮良，淮良，淮良，淮良

(貝爾一才白) 淮良响呢處(拋人頭介)

(雙卿先丰鉞仆地對人頭慢的的啞相思完悲咽花下句) 女在帳中啼，夫在窗前死，反恨人間太猙獰。

願隨夫下泉台，雙卿亦有驚人血性。(欲自殺)

(貝爾沖前攔住口古) 雙卿，雙卿，你係唔係揚州吉慶橋個個賀雙卿呀，真係久仰才名，如雷灌頂。

(雙卿喊介口古) 我就係賀雙卿叻，何必對我呢個未亡人講咁多恭維說話呢，乞借龍泉三尺劍，等我

早的番入枉死城。

(貝爾喝白) 將人頭厚葬厚葬

(二刀斧手應白) 咱(捧人頭下介)

(貝爾口古) 雙卿，你唔好怪我殺死亞紀先生，呢曾我係奉命(介) 你而家個女又咁細個，你又飄然

一身，我賜一間屋俾你，以後我每年供養你，等你兩母女相依為命。

(雙卿口古) 我決不食清廷肉食，未敢領受盛情。。

(貝爾白杭) 為此女才人，不能飄流於絕境，嬰孩不能無教養，我不庇護佢活不成，督府嘅隔鄰，有多餘地方剩，雙卿莫頸硬，暫且作居停

(雙卿這個台口花下句) 若不借取梟雄護蔭，他日焉能反清復明。。波兒猶得在李郎家(介) 多謝督大人救此可憐小生命。

(貝爾花下句) 傳令香車寶馬，接佢返南城。。

(落幕)

(第四幕)

(揚州睢寧侯故第門口連花園，十八年後)

八月十五，月當頭景，正面門，兩便走廊，衣什邊台口花基，什邊園門口，衣邊台口石枱檯

(蝶痕翠翠台口擺酒介)

(可憐我排子頭開幕)

(翠翠口古)蝶痕姐，一年又一年，我地係呢處斬吓眼又過左十八年叻，今晚係八月十五，個一個賀

雙卿又番呢睇我地大官嘅叻，蝦，亞大官去左邊呢，日日番呢都番咁晏嘅。

(蝶痕口古)翠翠，我而家都心煩意亂，我好多野做架，我係少爺最寵信，最心腹嘅丫環。

(兩梅香伴棲鳳食住此介口正面卸上介)

(棲鳳台口白)蝶痕你埋呢(介)我吩咐你的事幹做成點樣

(蝶痕一望兩望台口細聲口古)你個幾封機密書函，我經已派左叻，各鄉壯士都依時聚集，與你同甘

共苦又同患難。不過最苦嘅，就係手無寸鐵，又有兵器嘅，亦屬空談。

（棲鳳重一才慢的的內心關目頓足悲憤白）蝶痕，擔張橈呢比我坐（一才）拈的酒呢俾我飲（一才介）

長二王下句）兩行血淚濺河山，終日佯狂為把盞，一杯在手掩愁顏，一念到烈女當初曾死諫，

一念到虛鸞假鳳淚汎瀾，遺下一個孩兒誠漏懶，事關我一生愛念，都付以膝下痴男。雙卿亦

體念我嘅孤零，未肯向佢言明一旦。（白）飲（介）我除左飲酒之外重有乜野可以做嘅呢（介）

我嘅心情唔好，飲（介）（醉介火白）翠翠蝶痕，你兩隻野躡開呢（介）大官去邊處

（翠翠震介口古）少爺，我唔知阿大官去咗邊處呀，有邊處吖，梗係去咗總督府門口同埋梅姑玩啦

（蝶痕口古）大少，亞梅姑就係賀雙卿個女叻，你都要話吓亞大官至得，因為亞大官隨時陪佢玩到一

二更架。。

（棲鳳重一才慢的的內心關目突然火介喝白）你地躡開（介）（花下句）酒醉還有三分醒，恨無餘力

醒冥頑。。呵呵錫錫十多年，揮淚何堪把兒勸諫。（坐下發木獨介）

（橫波上介長花下句）月當頭，微嗟嘆，不到初更人不返，荒林靜苑，景色殘，枕畔窗前，皆枯冷，

幸得一點溫和父愛，不時對我呵錫呢喃。。小梅娘，佢伶俐聰明，才堪一贊。（白）我成間屋咁大，裏便係死嘅，毫無生氣嘅，我爸爸十足一隻醉貓，我亞麻，十足一個老尼姑，成日阿彌陀佛，個幾個老梅香，個面口都係冷冰冰嘅，我除咗夜晚番去屋企訓之外，我係屋企，好似有針拮咁，都好，好在外邊都有個梅姑陪吓我（介）夜叻，今晚八月十五，年年今日都有一個姑姐嚟睇吓嘅叻，睇吓佢嚟咗未至得（介白）爸爸

（棲鳳醉中睜眼白）波仔，你番咗嚟叻，行埋嚟等爸爸錫吓你（介）

（橫波被錫完台口白）唔，又試一陣酒除

（棲鳳略火介口古）波仔，我錫吓一年（雙）而家錫到你今年十九歲叻，我希望你聽吓我嘅說話，以後唔准你出去外邊玩。（一才）

（橫波一才台口）依依，爸爸今晚點解咁好火氣呢，唔駛怕架，好好頂佢兩句至得，恃住佢愛錫我，冇闖禍嘅（介口古）爸爸，你唔准我出街係嗎，冇問題，唔啱兩仔爺先嚟一個君子協定吓，

我亦唔准你飲燒酒（一才）如果你以後飲親酒嘅，我成晚唔訓隨馬路行。。

（棲鳳重一才離橈慢的的口古）亞波，你嘅心情點同我嘅心情呢，我非酒不坎，只有我唔准你嘅啫，點會你唔准我嘅啫，做仔嘅要干涉個老豆嘅，真係屬於荒唐怪誕。

（兩梅香扶老夫人掛佛珠，食住此介正面卸上偷聽介）

（橫波口古）爸爸，俗語都話為老不尊，教壞子孫，實在我唔學你飲到醉成一隻醉猫咁，我都算好生性叻，你乜野咁心情唔好吖，十幾年都未曾見你做過事，米又有人擔埋嚟，柴又有人擔埋嚟，唔怪得我朋友個個都話你好命叻，佢地話你明朝官爵清朝養，兩條大路，最精係你行中間。。

（棲鳳重一才離橈慢的的花下句）一言氣得我胸膛裂，七分怒火蓋眉間。。揮血淚，斂鋒芒，含淚把

孩兒勸諫。（白）波，第二個講出呢句說話，我就一刀殺咗佢嘅叻（一才）

（橫波食住一才台口白）唔知邊忽有刀呢，計埋厨房都無一把刀呀

（棲鳳白）阿波，不過你係我一手揸大嘅，我唔忍心難為你，你應該識性，我地身是明朝人，當為明

朝效力（左右一望）總有一日，我地兩父子手執多貝爾人頭，將亂刀劈殺（一才）

（橫波食住一才白）爸爸，咁就唔啱叻（花下句）你酒後狂言無理性，可知恩公情義重如山。。若非得督府隆情，你重點會有晚肉朝魚咁鬼嘆。（白）爸爸，咪話我教吓你吖，而家你所食嘅，都係多謝貝爾嘅恩賜，如果唔係嘅，豉油撈飯都有得俾你捱呀，你擔又擔唔起（一才）抬又抬唔起（一才）做乜野好呀，大丈夫失咗節之後，千祈唔好再講氣節（一才）合理眉目，過得一時得一時，過得一日得一日，學亞麻咁，念幾句阿彌陀佛啦

（棲鳳重一才慢慢的亂巴摑橫波跌地然後悲咽花下句）破碎之心無可碎，厚顏之外更無顏。。兒女不諒此心情，溺愛之心從此淡。（拂袖正面卸下介）

（老夫人一見棲鳳下則連隨台口白）乖孫唔好喊，亞麻錫番（介）亞蝶痕翠翠，你兩個會唔會扶起大官坐番起身

（蝶痕翠翠扶起橫波坐正面介）

(橫波扭紋發脾氣一掌打開蝶痕翠翠介)

(老夫人白)乖孫，你唔好喊叻(口古)喊壞，你亞麻做人唔成嘅叻，我地成籬神主牌都只靠你嘅叻波仔，你唔好怪你爸爸呀，佢成日飲醉酒法，脾氣起呢，至有咁猛。

(橫波口古)亞麻，你錯咯，我由一歲到今年十九歲叻，爸爸輕輕都未打過我一吓嘅，我都唔明白佢成日為乜事幹要飲酒(一才)為乜野事心情惡劣(一才)搞到要將我摧殘。

(老夫人一才白)乖孫，呢的就係離婚所累叻(一才)(口古)自你亞爸爸同你亞媽媽離婚之後，你亞媽就去嫁咗個文人，生咗個女，後來因為巴結現任個總督，出賣咗個文人，你爸爸因為受咗呢種離婚嘅刺激，所以至飲酒，把一切都丟開丟淡。(喊白)屣咗你爸爸呀，佢舊時都係明朝擎

天一柱嚟架

(橫波口古)亞麻，咁毒辣嘅婦人，爸爸重想佢嚟造乜野吖，我除非唔見到呢個所謂亞媽啫，如果見到佢呀，我唔搵把刀劈死佢，都打佢幾踭。(作狀打錯老夫人介)

(老夫人白) 乖孫，你點會唔見你呀媽啫，你每年都見佢一次

(橫波重一才白) 幾見過佢呀，嘛

(三百本：

(老夫人白) 乖孫，你每年今日八月十五例見一次面嘅所謂姐姐，就係你亞媽叻

(橫波一才白) 吓，點解呢，講比我聽啦，麻

此段手抄本無)

(老夫人白) 到呢個時候，你咁大個，我都唔瞞你叻(白杭) 等我抹淨呢對流淚眼，講一句時嘆一嘆，

如今天下婦人多，未見你生娘咁拼爛，離咗婚，嫁罪犯，嫁後未曾三兩天，忽然變此節食清廷

飯，佢而家鬼咁妥，鬼咁嘆，李家不容此賤人，只准佢每年一度將兒探，不准佢認生娘，恐防

有後患(悲咽) 時隔十多年，我才敢向你明言於今晚啫

(橫波一路聽一路喊介白) 亞嘛，你估我喊乜野呀，我唔係喊個衰鬼老母，我戩我爸爸唔抵啫(二王

下句) 今夕相逢見面，細認此狼毒慈顏。血淚眼中藏，待冷燕歸來一旦。(白) 我明白叻，亞嘛你去瞓啦

(老夫人白) 乖孫，我都番入去經堂念經叻，你知就了叻，唔好同的賤婦人見識呀(梅香扶下)

(橫波台口白) 坐埋一邊，嘿，一陣佢就知死叻

(兩梅香香車，雙卿包大頭披風，血梅小漢裝，傍車上介)

(雙卿台口花下句) 幾難望到蟬圓日，中秋月照耀我歸還。一年一度燕歸來，莫使孤雛長掛盼。(白)

得叻女，你同埋的丫環番去啦乖叻

(血梅白) 唉吔，唔掣，媽，我要跟埋你入去

(雙卿口古) 你年年送我到呢到門口就扯嘅叻，點解今年係都要同埋我入去呢，你又唔識人，又唔識

盛，冇乜好嘅，乖乖地番去讀吓書啦，咪成日顧住玩。

(血梅口古) 阿媽，今年唔同往年，今日唔同往日，我經大個女叻，我乜野唔識人呀，呢間裏便個個

波哥，同我都唔知幾好嘅，往年我細個入唔入去就好閒啦，而我要跟埋你入去，介紹佢認識我嘅慈顏。。

（雙卿一才驚荒口古）吓，你同阿波仔好熟咩，熟到乜野程度呀，你坦白的講比阿媽聽，唔好嚇到我魂離魄散。

（血梅口古）媽，咪問得咁肉緊啦，我知自愛嘅，就算熟極都有個限度嘅，老實講吓，我兩都經已情投意合嘅叻，爭住你呢個外母睇女婿啱唔啱啫。。

（雙卿一才驚荒白）唔啱唔啱，阿女你唔嫁得呀波仔

（血梅掩口嘻嘻笑介白）媽你咪咁傻啦，你都有同我講話阿波仔係你侄哥，呢舊陣時就話姑表不能成親啫，而家就無所謂嘅叻，何放係你姓賀，佢姓李，實在佢點叫你做姑架，我都唔明，得嘅得

嘅

（雙卿白）唔得嘅，唔得喇

(血梅白) 唉吔，我知叻 (花下句) 阿媽你係一個讀書人，生就一副舊頭腦，梗慌住小兒女，相見就羞慚。我至多迴避一時，請你代我將阿波哥心情一探。(白) 我好聰明嘅阿媽，我一陣番呢呢處接你 (與梅香下)

(雙卿感嘆白) 好彩阿女話比我知啫，如果等佢兩個好落去就不堪切想叻，人世間好多蘭因絮果，真係巧合到不可思議 (介) 我雖然得多貝爾嘅照顧，但係我都減衣節食，機杼縱生唔肯受清廷嘅供奉 (介) 唉，最可憐嘅就係棲鳳故人，佢到而家膝下猶虛，所以我唔忍心認番阿波仔，一年呢見佢一次，用針指做多少野送比佢，聊表寸心就算叻 (入介一才白) 侄哥

(橫波一才望見不睬，行不是坐不是忿忿然介)

(雙卿白) 侄哥

(橫波白) 哥乜野吖

(雙卿白) 侄哥，我每一年呢見你，每一次見到你，你都好歡喜，擔張橈比我坐嘅，點解今晚今晚今

晚

(橫波晦氣白) 個處有橈吖嗎，你自己唔會坐咩

(雙卿坐下愕然強笑白) 侄哥，我每一年來見你，一見你啫，就梗係斟杯茶呢比我飲嘅，點解今晚今

晚今晚

(橫波晦氣白) 茶我就唔斟叻，一陣我預備燉一碗參比你食吓

(雙卿笑介白) 唉吔，侄哥原來你想燉一碗參比我食呀，我都知道做侄哥嘅，一向都好愛錫個姐姐嘅

(橫波一聲不响擔石橈跌落雙卿之旁，晦氣坐下黑氣個面口介)

(雙卿一才愕然白) 侄哥，做乜事幹咁黠呀

(橫波口古) 姐姐，我唔係黠，不過覺得好奇啫，你知道嗎，揚州有條新例，好多婦人將個仔呢叫侄

哥嘅嘍，你估點解呢，因為離咗婚，唔好意思認番個前頭仔，咁唔係叫個仔做侄哥囉，蝦，怪

不得話揚州婦人聰明可贊。

(雙卿一才離欖口古) 唉吔侄哥，點解你會講出呢幾句說架，你嘅話中有刺，直透我心間。

(橫波口古) 晦氣介) 侄哥，仔就仔叻(一才) 重哥乜野吖，如果仔都可以叫做哥嘅，天下間邊度有

倫，我，我真係比你激到我喊。叻(介)

(雙卿重一才跌椅，錯跌落地介，悲咽白) 邊個話比你聽

(橫波悲咽白) 阿麻話咯

(雙卿悲咽口古) 唉，真係發夢都估唔到，老夫人確係慈祥一片，十八年叻，都重比個機會我重認親

生。。(撲埋攬波仔哭相思介)

(橫波食住哭相思憤憤然介火白) 喊完未呀，喊完就躡起身坐好啦

(雙卿台口愕然白) 衣衣，做乜佢知道我係佢阿媽，重反為喝到我失魂(笑介) 乖仔，你叫媽坐，亞

媽就坐係啦(呆呆然坐下介)

(橫波白) 阿媽講完一筆至一筆，你每年呢見我，梗有一樣野送比我嘅，今年有乜野呀

(雙卿白) 呀，係喇，你唔提起我都唔記得咗添，我今年造咗個香囊袋比你呀，仔(交香囊介)

(橫波接介慢的的口古) 呢個香囊袋舊嘅，比人玩完玩剩嘅叻，我舊年見到一個同呢一個色一樣嘅，

你估殘到點架，首先就比我阿爹玩過，玩完又比揚州一個文人玩過，玩唔到兩日啫，個文人就死咗叻，後而家又比個個多貝爾玩過，咁殘咁舊嘅野，哼，點值得我今時顧盼。(擲於地介)

(雙卿重一才慢的的離欖口古) 仔，你呢幾句說話分明話中有刺，你唔應該借呢個香囊袋呢諷刺慈

顏。。

(橫波口古) 慈顏，請你唔好慈母自居叻，世間上縱然有嫁兩嫁嘅慈母，但係都唔會有賣夫求榮嘅女壞蛋架。

(雙卿重一才跌倚錯落地悲咽介口古) 仔，你唔好羞辱我，唾罵我，阿媽做人，呢世實在好艱難。。

(哭泣介)

(橫波亦踏於地滋油介白) 你艱難(霸腔弔芙蓉) 你呢隻脂粉豺狼，令我羞顏盼。堪憐我生父，為你

慘受酒力摧殘。。有什麼骨肉親情，你又何須喊。投在梟雄嘅懷抱，寧不任縱橫。。（花）從今後，休再認兒郎，你委實令人齒冷。（狂怒擱卿兩巴白）你呢種咁嘅婦人，人人得而攻之，人人得而擱之（喊介）你都害得我爸爸慘叻

（血梅食住此介口卸上偷看介）

（雙卿慢慢的撫面悲憤介台口長句花下句）撫面暗低頭，喊亦無可喊，廿年飽受人家慘，枉費一年一度燕呢喃，一巴盡把親情散，夢醒方知做人難。。（撲埋打波兩巴介）

（棲鳳，兩梅香伴，食住此介口正面卸上介）

（雙卿花）估不到十八載血淚流乾，只搏得斷場嘅今晚。（再打一巴介）

（橫波一掌推雙卿跌地口古）你打我，等我拈起個花鋤，將你攔腰亂扳。（先丰鉞）

（血梅先丰鉞口古）亞波哥，你為乜野事幹打佢呀，呢個係我亞媽，即係你未來外母嚟架，如果你咁

對待佢，聽我同你唔橫搞到橫嘅啫。。

(棲鳳一才喝白) 亞波，放低個花鋤

(橫波放低花鋤介)

(棲鳳台口擱波兩巴火介白) 你為乜野事幹要打佢(一才) 你為乜野事幹要難為佢(一才) 我真係而得挖咗你呢對無珠嘅玉眼。

(橫波大哭介口古) 爸爸呀，我打佢都係為你(一才) 真係好心犯雷劈叻，抵你成世抱住個酒埕過一生。。

(棲鳳扶起雙卿介花下句) 小孩兒，未解人倫天性，你何必珠淚汎瀾。。(介) 有機密，待商量，我共你剪燭西窗，把危亡救挽。

(雙卿會意點頭行埋白) 爸爸有冇打親你呀，等我錫番吓你吖(介)

(橫波火介白) 躡開啦

(棲鳳白) 雙卿，唔好理佢咁多叻(扶雙卿正面下介)

(血梅坐下白) 波哥，你埋嚟坐低，我有的野同你傾吓(介) 我同你離婚叻，拆擋叻，永遠都談唔到結婚兩個字叻，開講都有話愛屋及烏吖嗎，你愛得我，你應該尊重我亞媽吖(口古) 你嘅所為咁樣，有乜法子唔把姻緣拆散吖。

(橫波口古) 離鬼離馬咩，結鬼結馬咩，蠢梅，傻梅，你係我個妹嚟架，同理一個亞媽生。

(血梅重一才愕然口古) 乜野話，我係你妹(介) 點會啫，你姓李，我姓紀，風馬牛不相及，點會講得咁怪誕。

(橫波口古) 蠢女，你亞媽嫁咗比我爸爸，生咗我，咁我唔係姓李囉，同我爸爸離咗婚，再嫁咗你亞爸，生咗你，你唔係姓紀囉，以後你都唔好同我談情說愛，倘若骨頭搗亂，就要怕雷行。

(血梅重一才慢慢的的花下句) 被佢一言道出當年事，未曾痛哭已羞慚。亞媽佢背人垂淚豈無因，方知佢嘅遭逢誠太慘。(喊白) 我亞媽條命真係唔好叻

(橫波白) 你亞媽條命何只話苦呀，我話賤格就真(一才) 抵殺就真(一才)

(血梅一才火介白) 喂，你唔好立亂抵毀我亞媽嘞，我心痛嘅嘢。(一才) 我打你嘅嘢。(一才) 我亞媽
你有份咩，衰波，死波

(橫波白) 等我數你亞媽的衰法俾你聽吓吓。(口古) 你知唔知道你亞爹紀淮良點死法架，係俾你亞媽
出賣，然後至俾多貝爾一刀處斬。可憐你爹未寒屍骨，你亞媽就有意高攀。。而家你所着嘅係
邊個嘅，所食嘅係邊個嘅，就係多貝爾嘅，如果你亞媽同佢冇關係，你兩母女今日邊處有咁嘆
吓。你話衰唔衰，抵殺唔抵殺，實在應該俾五馬屍分。。

(血梅重一才慢的的如夢初醒介長花下句) 血淚未曾收，怒火凝於眼，國債父仇難丟淡，輕輕頓足怨
慈顏，當初我父既被梟雄斬，何必重領受清廷肉食，點怪得佢被人譏笑被人彈。。怨慈娘，恨
慈娘，總有一日把親情毀爛。(哭介白) 亞波，你做人正義，鬧得好，鬧得啱

(橫波口古) 梅，你為民族，為冤仇，你亞媽重與虎回巢，你話應唔應唾罵佢於一旦。

(血梅刺激過度瘋狂介口古) 應該，應該，謾講話唾罵佢，就算鋤死佢都好啱。。(白) 我有面見人

叻（掩面頓足下介）

（雙卿與棲鳳卸上介）

（雙卿台口口古）鳳，你一陣使蝶痕來我處啦，所吩咐嘅一於照辦。

（棲鳳口古）你番去擺定酒，無論如何，都要成功架，因為起義在三更。

（雙卿下介）

（橫波白）爸爸，隔夜素馨，唔好睬佢叻

（棲鳳白）多事（花下句）此夜有心成大業，無心管教你呢個小畜牲。

（喝波同下介）

（落幕）

(第五場)

(華麗房景)

什邊立體門及窗，衣邊大帳，台口枱，酒具

(蝶痕伴雙卿坐幕介)(蝶痕擺酒)

(排子頭一句作上句開幕)

(雙卿口古)蝶痕，你記住叻，如果條鎖匙一到手，暗中交咗比你，你就好即刻返睇寧府叻。(白)

任何一個你都唔好比人知呀，就算我個女亞梅，你都唔好向佢洩漏半點，因為佢年紀細，唔定

性呀

(蝶痕口古)得叻，望夫人把風情稍賣，然後至可以暗拔虎鬚。

(雙卿花下句)老風情，倘若仍可賣，當效美人玉手盜兵符。我都知道係與虎謀皮，但望亡夫庇護。

(蝶痕擔橈台口預備貝爾坐)

(四刀斧手，四清兵先上介)

(貝爾携劍上介台口花下句) 十八年望梅止渴，思量不禁微笑撫鬚。雙卿不愧是才人，今日之心仍
愛護。(喝白) 呢處溫柔鄉，冇危險嘅，你地返出去門口處等我

(四刀斧白) 咱(與四清兵打手退下介)

(貝爾入介)

(雙卿白) 督帥大人請坐

(貝爾白) 坐(坐下介)

(血梅食住此介口滿面怒容上見狀窗外偷看介)

(雙卿捧酒笑介口古) 督帥大人，我好多年都唔會同你飲過酒叻，今晚我好寂寞，冇乜了賴，行不安，

坐不安，都係想住你，所以請你過嚟飲一杯，我知你素來都有瞓得咁早。

(貝爾接酒暈浪倒在衿上當飲介口古) 雙卿，你行不安，坐不寧，都係想住我，點解呢句說話咁多年
都唔聽見你講呢，真係一聽見啫，我令我遍體皆酥。。

(雙卿口古) 我都知道你好仰慕我，或者可以講你係愛我(介) 不過愛都有用吖，賀雙卿而家眼尾都
縐縐地，唉老。咯老咯

(貝爾笑介口古) 我唔係幾覺得啫，俗語都有話，雞仔冇定性，老藕至夠風騷。。(成機一攬卿拗腰
坐膝頭介)

(蝶痕一笑衣邊臥室門卸下介)

(血梅掩面頓足不忍看介)

(雙卿花下句) 所謂滴水之恩還須報，你待我確係義比天高。。路遙知馬力，日久見真情，我都好想
話以身為酬報。

(貝爾花下句) 你都唔知道我十八年隔牆夢想，你嘅溫柔倩影長在我心牢。。怪不得世上無難事，只
怕有心人，咁就渴解相如雖趁早。

(雙卿略推開介口古) 嘩，有心唔怕遲，十月都係拜年時，就算係都唔好比我女兒知道。

(貝爾口古) 傻嘅，橫又係知，掂又係知嘅叻，佢遲早都要叫我做老豆嘅，只要你認定我係你番頭丈夫。

(雙卿坐下不歡口古) 雖然你咁愛我，我亦都咁愛你，想落都唔份嘅，好多禁區我都唔去得嘅，有時想話係朋友面前派吓都唔得，個處又話糧食倉，個處又話係軍械庫。

(貝爾口古) 嘩，咁容易吖，等我陪埋你的朋友去，你去邊處禁區，我都可以盛意招呼。

(雙卿口古) 我重敢同你行咩，唔怪得的朋友笑我叻，連你的手令我都有一張，點得係督帥嘅情婦。

(貝爾口古) 得得，我即刻過去隔離寫一張比你做護身符。

(雙卿故意白) 唉吔，又唔駛咁心急

(貝爾白) 我呢世人好爽快嘅，話得出，就要做嘅(花下句) 千金難買美人一笑，寫張手令都唔駛幾耐工夫。寧失信於天下民心，莫失信於溫柔情婦。(白) 我即刻過隔離寫好帶埋佢嚟，同你好

好地抖番一晚(下)

(雙卿坐下介)(蝶痕卸上二人相對一笑介)

(血梅慢的的入介一步一步行埋卿前白) 亞媽

(雙卿白) 乖女

(血梅口古) 亞媽，你同多貝爾暗中來往就好啦，你為乜野事幹要賣埋咁多老風情，說埋咁多肉麻說話，發老姣，就寧可自己知，不可比人見，請你唔好口口聲聲自己認係佢枕邊情婦。

(雙卿一才笑介口古) 亞梅，你早的入去瞓，唔好理咁多事，你年紀輕，何必捲入此惡浪波濤。

(血梅口古) 嘿，亞媽，你個女都已經十八歲叻，實在你坐係人地個膝頭上便，你自己唔見得面紅耳熱咋，我都覺得身燒火慶叻(火介)想後思前，實在我都唔知幾比面至叫你一聲老母嘅叻。

(雙卿一才口古) 亞女，我坐係人地膝頭上便，呢的係另一回事，除咗之外，我有乜野對你唔住呢，亞波咁對付我，我已經夠受嘅叻，你係我一手揸大嘅，假如你講句說話重的啫，亞媽都難受煎

熬。。

(血梅火介白) 講句說話重的就只叻，大力搵吓你又點呀(打兩巴介花下句) 今晚並非耳聞，乃係我親眼見(一才) 你都算得係蛇蝎妖狐。。唯有嘆一句錯投胎(一才) 竟有此淫婦為娘(一才)

難怪我置偷常于不顧。(悲咽火介白) 我亞爹係比邊個出賣嘅(一才) 我亞爹，係由邊個所斬嘅

(一才) 我而家所着嘅係誰人所賜嘅(一才) 亞波哥個爸爸半顛半癡，係誰人所累嘅(一才)

(雙卿喝介白) 夠叻夠叻，你唔駛再問我叻(花下句) 肩上已承千鈞責，更無心緒教兒曹。。小鳥焉知世道難，我何必把衷情為吐露。(火介白) 你亞爸係邊個出賣嘅都好，係邊個所斬都好，你身上所着係邊個所賜都好，一切一切都唔駛你理，早的躡去喇，聽日至見我啦

(血梅重一才火介口古) 唉吔，乜野理由唔駛我理呀，俗語都有話，先人作孽後人當，你抓爛塊面皮，影響我都唔會好架。

(雙卿急介口古) 亞梅，你好收聲囉嚟，唔係我拈沙籐打你都有知架，督帥就嚟入我房嘅叻，唔該你唔好對住我鬼煞咁嘈喇。。

(血梅重一才火介白) 亞媽，我唔準佢入嚟見你

(雙卿亦大聲介白) 點到你唔呀，佢唔入房唔得嘅

(血梅重一才慢的的由火轉喊白) 亞媽，我寧跪下你叻，(跪下乙反中板下句) 骨肉總情長，我不忍

見芙蓉帳內，多添此一段孽債，糊塗。你亦有慧質蘭心，何以性楊花，幾次琵琶別抱。一代

女才人，何苦受千秋唾罵，玷辱了後世兒曹。泣血再牽衣，望你勒馬臨崖，早日削潛修佛道。

怕只怕到收場，淪落街頭餓婦，辜負你錦秀才高。(花) 百拜親娘，莫與虎同眠，貽羞千古。

(拜介)

(雙卿白) 女，我都多謝你關懷我(乙反二王下句) 你嘅迷夢未曾甦，莫當慈為蕩婦，我嘅心弦撩亂，

你莫跪地哀號，望你迴避一時，離綉戶，任你千聲埋怨，我此際亦感覺毫無。你嘅熱血奔騰，

我都有真情相告。(白) 過幾日你就明白嘅叻，快的瞓啦

(血梅白) 媽，總之我唔比佢入嚟，我已經聽住你約咗佢入嚟瞓嘅叻，你而家梗係借頭借路，話有原

因啦

(四刀斧手伴貝爾招手令上介門外白) 我嚟咗叻

(血梅一才白) 我唔准你入嚟

(雙卿白) 唔係啫，請入嚟啦，造乜去得咁耐架，掛得我吓

(貝爾入介交手令與雙卿，雙卿背手暗中交與蝶痕)

(蝶痕借頭借路拈手令什邊卸下介)

(血梅先丰友執爾台口古) 清韃子，我唔准你嚟，你偏要入嚟，你唔恃得住權勢，十幾年來一直玷辱

我老母。我重有良心血性架，你難怪我暗裏操刀。。(突然以菓刀插損貝爾之面介)

(貝爾執住梅手花下句) 估唔到你雙刁蠻小風，竟然暗拔虎鬚。。將你殘命保存，無非念在前情婦。

(將梅擱一輪打一輪喝白) 扯

(血梅掩面狂奔出門外台口白) 我要去通知所有紀氏宗親(一才)所有揚州嘅父老(一才)揭揚亞媽

嘅罪狀（一才）（瘋狂下介）

（雙卿掩面快哭相思介）

（貝爾花下句）雙卿何必為此女兒痛哭，佢實在係一個叛逆之徒。良宵一刻直千金，我同你生番幾

個來補數。（埋位吹熄枱燈全場暗光）

（內場嗶呵聲，鳴鑼聲戰鼓聲，正面窗外火光）

（快沖頭）（清深子上介報白）啟稟督帥，村民擁劫軍械庫

（貝爾茅介白）帶馬帶馬（與探子刀斧手同下介）

（雙卿水介白）好咯好咯，呢次我地楊州人重見天日叻

（內場嗶呵聲，鳴鑼聲，戰鼓聲，力力古）

（血梅帶魯松魯岳二父老四壯士拈枷鎖上入介）

（血梅悲憤白）當年出賣我亞爹嘅又係佢，共督帥朋比為奸嘅又係佢

(魯松先丰友執卿一掌打跌地口古) 唉吔，我認得你叻，我認得你係十八年前個一個李家淫婦。

(魯岳口古) 照鄉例應該火葬，人來將佢帶往前途。。

(甲壯士將卿一推掩門拈鎖練套在卿頸上，雁兒落拉下介)

(各人隨下)

(血梅忽啼忽笑花下句) 為此父仇血債，講乜野兩字劬勞。。(白) 我重去講比亞哥聽(奔下介)

(落幕)

(第六場) 紀氏宗祠連火葬景

(衣邊紀氏宗祠，門口什邊麻石有小山路直上刑場，下為火坑熊熊火光)

(開邊起幕)

(兩村婦包頭布着裙各捧柴一網上介，擲落火坑介)

(甲村婦口古) 二孀，照我地揚州規例，火葬乃係一總極刑，受者乃係了彌天大罪。

(乙村婦口古) 大嫂，個一個賀雙卿又係抵佢監生葬落火坑裏面嘅，出賣咗個結髮丈夫，出賣咗親生

兒女都唔好講叻，出賣國家，出賣民族，所有揚州嘅女人都比佢陀衰。

(大笛水底魚，四武夫拈火把先上企立火坑旁，四父老兩婦人跟上介，企立于祠堂門口)

(急急丰，雙卿散髮白血衣冇頭雞仆出介)

(魯松白鬚白髮拈鞭跟上扯雙卿一網三標一腳打雙卿冇頭雞起身掩門跌地亂鞭打雙卿介)

(雙卿白衣露紫標介)

(魯松白杭)前有山，後有水，岩前有火坑，鄉間有規矩，你殺夫郎，經有罪，何況更出賣兒和女，左便嘈什聲，右便有火炬，所有揚州人，聯群皆結隊，不殺婦人心不甘，不葬婦人天不許，我打一鞭，問一句，難怪你忍氣吞聲無應對，等火光紅滿半邊天，亂鞭打你落火坑裏(包一才打

一鞭介)

(眾父老喁呵，各人拈石亂擲雙卿介)

(雙卿主題曲火葬揚州一婦人)

(寡婦訴冤)似夜鶩，被雨打，淚灑人群裏，似月亮，被雨打，避泣寒雲裏，棒碎，我嘅魂亦碎，真不禁淚落唏噓(乙反清歌)雙卿本是良家女。生在吉慶橋旁惹蝶追。解得詩詞個陣方十歲。艷壓群芳在門閭。紀氏淮良乃係奴伴侶。為民為國已捐軀。最是斷腸膝下一對兒和女，唉，兒和女。(二王下句)好比驚雷破夢境，滿懷憂恨，訴向伊誰。一幕幕舊事如煙，渺渺幻作斷腸詩句。慘似杜鵑啼，人間今何世，誰個劫餘悲節婦，誰個火網哭芙蕖。(新小曲罪

婦吟）「火燄紅似風林醉，衾上呀裙前皆血淚，縱然借得三江水，身上泥塵難洗去，望殘樓，飄柳絮，輕輕飄入紅爐裏呀，殘葉猶得化成痰，疊恨焉能埋火蕊（乙反中板下句）泣血念前塵，憐此西湖瘦影，何堪受鐵索鞭撻。瘦骨尚冰清，熱血尚晶瑩，待我一訴生平花絮。黃葉怯風狂，何曾有蟬聲殘曳，借燈花解救玉郎頹。殉難響喪鐘，腸斷故人來，淑婦已是無言相對。雪雁再飄零，待等鶯飛尋故侶，可憐愛子未許相隨。陋巷再逢君，那堪再斷腸，產下了血梅個個嬌嬌女。人在帳中啼，夫在窗前死（轉正線慢板下句）從此魂魄不回。一年一度燕歸來，傷心未敢談母愛，雖是乳燕投懷，我都是欲迎還拒。情重李家郎，夜夜妝台長盼望，我未敢把嬌兒相認（二王下句）念在佢膝下猶虛。好一個子証娘兇，好一個女揚母罪。（轉秋江別）痴心未解痴心累，色已衰，貌已衰，我命葬鬼墟，憂國心磊落似水，半生寂寞無情趣，那知今日芳心碎，心灰心灰，累我一身責恨難誰（補序）（轉流水連環南音）誰憐風雨把花摧。摧命無

常揮不退。退臨崖畔，一任火葬殘梅。梅心到死仍未悔。（二王下句）悔恨我一年一度，枉與愛子相擁相偎。。更恨此無目鄉愚，只曉得烹紅（花）煮翠。（哭隻思）未忘一對兒女

（魯松喝白）你重有乜野說話吩咐落呀

（雙卿白）冇叻，到呢個時候我都欲哭無淚叻，重有乜野好講吖

（魯松口古）我地揚州不幸，至出產倒呢個兇狼婦女。各位鄉親，各位父老，望你地再鳴鑼召集，等多的人睇見呢一隻蛇蝎，瞬刻化成灰。。

（四武士在什邊鳴鑼介，襯行雷閃電眾人食住喝呵）

（魯松食住拈繩將雙卿網綁，拉埋衣邊介）

（食住鑼聲沖頭，橫波上，撥開眾台口白）葬左未（雙句）叫佢地唔好住（一才）唔好葬住呀（主題

曲火網驚鴻）（唱連環扣）夜雨（雙句）風霜摧，怕聽陣陣驚雷，心經盡碎，忍見漫天漫天紅若醉，欲叫欲叫聲唏噓，怕聽笑浪相隨，淒酸喚句，披髮狂哭狂哭人若醉，唉，何堪記念從前，

我嘅年將年將廿歲，受恩要念誰，每年夢裏一相偎，月明未見燕歸回（乙反二王下句）一片片草綠與紅蓑，一聲聲鳴鑼心破碎，父老聯群和結隊，眼前火幕已低垂，凝睜尚有一點思親淚，有話親情深似海，忍見佢受殘摧。此際臨危，何堪共佢重相聚。並不是禍從天降（正線）乃是舊債應追。斷送了結髮恩情，出賣了國魂誰憐禍水。（漁歌晚唱）目覩荒村譏誚鬧似墟，聲蓋碧天相見自怕相對，火燄未堪燒弱絮，我已力竭聲衰，獨個偷自去，去問句梅娘便可知，觸怒了群情惹起驚雷，非關我負了心，垂淚怨恨誰，我亦悲痛極已不願去（反線中板下句）翹首望碧翁，低頭思往事，寧不令我意冷心灰。我不怨他怨誰人，總不怪佢改嫁重婚，亦怪佢背兒拂袖去。失足已難番，既得忠良伏護，我父亦不望佢把心回。難測婦人心，出賣了明末遺臣，與梟雄同相聚。賣愛以圖生，欲洗盡才人淡薄，妄求寶馬香車。孽海有珠遺，好一種正義天真，是揭揚母罪。驚動了紀氏宗親，惹起民情怒吼（二王下句）我縱有駟馬難追。（流水南音）慈娘犯了一種彌天罪。點受得當頭亂棒葬火堆。父老鄉親一灑山河淚。復明責任寄伊誰。

了卻親情我偷把義旗舉，義旗舉。(花)趁此鄉情鼎沸，我亦當光復鄉居。。只聽得萬眾喧騰，未免過於暴戾。(白)葬左未，葬左未，點解唔見咗賀雙卿呀

(雙卿重一才先丰鉞扑開台口跌地慘叫白)阿波(雙句)

(橫波重一才慢的悲咽白)阿媽，阿媽

(橫波口古)雙卿，你雖然係改嫁咗啫，但係你始終都係生我嘅，我雖然恨你(一才)憎你(一才)但係不至於出賣你(介)你唔好怨我狠心呀，你知唔知係邊個揭揚你有罪。ㄟ

(兩梅香拈火把伴血梅食住此介口卸上偷聽介)

(雙卿點頭白)波仔，我知我知，係阿血梅出賣我嘅(介)千日都係仔好女唔好，仔你埋呢比阿媽錫番啖啦，你真係抵錫，估唔到個女，會對我咁衰。。

(橫波口古)我唔比你錫，你唔好錫我，講開又至講啦，媽，仔又係你生嘅，女又係你生嘅，不過唔同老豆啫，你唔應該咁偏心，呢女就成日對住，對住呢，就每年睇一次，唉，對住對住有乜用

吖，佢都係之到你嘅壞處，唔會領略到你嘅好處。架阿媽

（血梅重一才反應介）

（雙卿苦笑口古）波仔，以前嘅事唔好理叻，總之仔固然係好，女，想落都係好女（一才）阿媽捱咗幾十年，我唔怨，我唔恨，總得到一對有為嘅兒女，我又何惜身化為灰。。

（橫波一才憤介白）個個衰女你都重話好女，阿媽你抵死叻（花下句）佢不念養育情，不念慈母教，親情教育兩皆虛。。你嘅人將死，對佢尚愛難忘，何以你不愛兒郎偏愛女。（憤然頓足白）抵你嘅叻，抵你嘅叻，個個衰女你都重話好女

（雙卿苦笑白）波仔，阿血梅唔係衰女，係好女，你慢慢的就知嘅叻

（血梅慢慢的感動沖口而出白）阿媽（再慢慢的的一輪內心矛盾跪下悲咽口古）阿媽你臨死嘅時候，都重咁愛錫我，唔通做女嘅，見你死僅頭，都唔知道愛錫你咩，我錯，我錯，我錯，我錯，我唔應該揭發你嘅往嘅彌天大罪。。（自言自語介）到抵邊個殺害阿媽呢（用力講介）到抵係邊個殺害阿媽

呢（一才介）

（橫波食住一才火介插白）衰女殺阿媽嘅，唔係你重有邊個吖

（血梅口古）唔係我（用力）唔係我（一才）（**三百本：我唔應該喊，我實在應該笑，（狂笑起身）殺**

亞媽嘅，係國法鄉刑（一才））殺阿媽係民心激動（一才）如果呢總婦人都唔葬係火坑之下，點

能救挽得國運衰頹。（慢的的內心矛盾）我把口雖然咁講，我個心係好痛嘅（悲咽）我何忍血

浴親娘，在我眼前相對。（慢的的）我都話唔應該喊叻，喊呢做乜野呢，我不能因小孝而忘大孝

（一才）我不能拘小節而忘抱負（一才）眼前流血嘅何只係我嘅親娘，回想清兵入關，揚州十

日屠城嘅時候，所流血者，何只盈千累萬，呢一個，不過係出賣丈夫，出賣民族嘅婦人，點值

得為佢再灑同情之淚。（拭淚用火介）賀雙卿，你知唔知道明末孤臣在泉台飲泣，萬千冤鬼不准

你再活陽居。（冷笑介）賀雙卿，你知唔知道十八年國恨家仇（用力）八千里山河破碎。我不

怪你享受清廷肉食，只怪你與梟雄為伍（搵介）呢的係唔係你無衰搵嚟衰呢。。你睇見嗎，四

面火把，十面鳴鑼，一來係私用火刑，二來係把義旗高舉。亞媽，今晚你死話唔定聽日我死，雖然同理一個死字喎，但價值就差得遠叻，你為喪心伏法（介）而我呢，我就係為明室捐軀。

（眾父老哄動介）

（橫波火介喝止白）你地咪嘈（介）衰女，你個把咀都好似胡椒咁辣嘅喎，我想知道吓係邊個教你嘅

（一才）

（雙卿食住一才白）波仔，你唔好鬧佢，係阿媽教佢嘅，好辛苦至教得佢咁〇架

（橫波頓足搵白）係咁就抵你叻

（雙卿苦笑白）唔好搵掙叻（長花下白）欲笑不成聲，哭哭無眼淚，卻了殘生殉烈女，我唔助他更有

誰，但願以身祭義旗，成義舉，仔呀你休灑淚，莫唏噓。今夕先帝會孤臣，一死比生存還樂趣。

（狂叫白）阿仔，阿女，快的快的叫人推咗我落去火坑裏便，快的啦（雙卿〇迫介）

（橫波重一才攔介長花下白）左右兩為難，無從分進退，赦免欲求皆不許，忍着火葬置茱萸，跪在祠

堂重喚句，喚句宗親父老，莫把佢過份殘摧。縱不念親情好，亦當念鄉情長，唉，莫問佢是
冤還是罪。

（眾父老哄動反對介）

（血梅喝介由）你地唔好嘈（花下句）掩面低頭不敢重張望，忍見千萬無常把命追。（介）天將曉
金鼓待雷鳴，光復之前，何必求恕罪。（揮手）任各人處置介）

（魯松一才拋鬚白）呔，左右鳴鑼，將婦人綁在山岩柱上，等待金鼓雷鳴，再將佢推落深淵火海啦

（左右鳴鑼雁兒落兩武夫將雙卿網綁在什邊山岩上之柱介）

（橫波食住雁兒落三攔介，被武夫三腳打開，絞紗，此介口煩認真一度介）

（血梅什邊台口掩面痛哭不忍看介）（雁兒落收掘）

（橫波先丰友台口怒搥梅兩狂叫介）衰梅，衰梅，你個心都夠狼毒嘅叻

（血梅狂哭白）打啦，打啦，亞哥，你打啦，你唔同我，我為報父仇，為民族，不能不同意咁做嘅叻，

你打啦哥

(橫波亂拳打梅介)

(搗戰古行雷閃電介)(力力古)

(棲鳳面搽油，頭陀白戰衣，咬單刀，拉皮鞭，一路鞭貝爾(辮笠血衣)上介分邊冇頭雞介)

(棲鳳擲鞭大花下句)十八年醉鄉未曾忘國難，我為誰忍淚藏居。此際萬家燈火萬張刀，要把梟雄

撕斷碎。(批頭一腳介)

(貝爾掩門跌地跪下花下句)只悔我一時迷惑，鯨吞有夢總成虛。軍械庫，竟被婦人開，束手被擒，

是那雙卿所累。

(棲鳳重一才力力古如夢初醒介白)吓，賀雙卿而家係邊處

(橫波衣邊跪下白)爸爸，你睇吓吓，賀雙卿而家唔係綁咗落山岩上便

(棲鳳重一才鑼古鼓看完口古)各住宗親父老，你地為乜野事幹要將賀雙卿綁在山前火葬(一才)你

地快的放左佢落嚟，千萬千萬不能侮辱佢。(白)放，放

(眾父老喁呵不許介)

(棲鳳車身分邊看介)

(血梅什邊跪下口古)李伯伯，我亞媽命該如此嘅，你唔好念在佢係你前妻，代佢苦苦求情，第一，佢改嫁重婚，第二，佢把夫郎出賣，第三，佢共梟雄為伍，好應該將佢葬火渠。。

(棲鳳走埋唾之白)呸，你識乜野吖(中板下句)忍聽山上杜鵑啼，忍見婦德埋火網，不禁一聲怒吼，似行雷。。個一個賀雙卿，節義雙存，乃係我地揚州一位才女。曾記得十日屠城，共我作虛鸞假鳳，何曾有枕蓆依偎。。風雨產嬌娃，窗外斬孤臣，也不過是清廷，暴戾。可憐佢為存孤，才肯受梟雄肉食，十八年苦節守大了血梅。。若非佢與虎同巢，怎能軍庫重開，試問誰個能襄成今晚嘅義舉。呢一朵火坑蓮，乃是大明國瑞，捨佢誰個光復舊門閭。。(花)何忍見此一代慈祥，葬在此一對痴迷兒女。

(父老眾人皆飲泣介)

(橫波急足上岩上解雙卿並扶下跪地悲咽介) 亞媽

(場上眾人除白髮白鬚外均跪下介)

(雙卿連隨還禮拜揖介)

(橫波乙反滴珠二三下句) 忍見鮮紅血濺。忍住貼面把罪賠。一年一度恩義難忘。我願共親娘同相

聚。(插白) 亞媽。你原諒我啦媽

(血梅跪下狂白) 呢個亞媽係我嘅(滴珠乙反二三下句) 生錯呢對無珠肉眼。今已知錯難回。但願

死謝娘前。望你重叫女兒一句。(白) 亞媽。我抵死嘅叻。你叫我一聲亞女。咁我就死都安樂叻。

亞媽。唔好怪我叻。亞媽

(樓鳳一才一掌推血梅跌地火介口古) 你埋嚟做乜野(一才) 你配有咁嘅老母咩。哦。原來你就係咁

聰明(一才) 咁衝動(一才) 乜野叫做不義滅親呀(一才) 你都不知道所謂人情(一才) 不知

道所謂倫理（一才）我地揚州唔容許有你呢種忤逆女架。（喝白）扯

（雙卿苦笑口古）樓鳳，你唔應該鬧佢（一才）你應該讚佢（一才）我唔輕易教到一個造女嘅都咁有為（介）我重記得淮良就義嘅時候，我受咗一種心靈嘅感應，我似乎聽見亞淮良响我耳仔邊講，

佢話生男當為明室忠，生女當為明室死，而家血梅出賣我，無非係為民族，而求博愛，而家我心滿意足叻，你地千祈唔好鬧佢衰。（白）女，埋嚟，比亞媽錫番啖你啦

（血梅瘋狂撲埋拖長叫白）亞媽（攬實哭相思介）

（橫波一才白）爸爸（一才改口）李伯伯（短鼓播包才）

（棲鳳食住短鼓播難堪介）

（橫波口古）而家天將嚟明，我地不如將呢個萬惡梟雄亂棒打落火坑裏。

（棲鳳一才口古）先將佢碎屍萬段，然後至將佢火化成灰。（先丰友舉刀介）

（貝爾口古）我遲又死，早又死，橫又死，掂又死嘅叻，等我死遲一陣，講埋幾句。你地忠於明室福

王，等如我忠於清帝，所謂勝則為王，敗則為寇，到尾亦唔應該笑我衰。。我臨死嘅時有多少感觸，中原始終不能屈服於異族嘅，小小一個揚州，乃有此貞祥國端。你問吓亞雙卿吖，我供養佢十八年，每年見佢一次，手都未曾摩過佢一吓架，唔知係我太重才，抑或太戇居。。叻

（雙卿花下句）呢一個清廷獵犬，佢亦曾將愛女栽培。。倘若肯棄暗投明，我亦不忍佢投身火蕊。

（棲鳳花下句）可知無情刀在頸，梟雄你何必淚交垂。。識英雄者重英雄，一髮千鈞你要知進退。

（貝爾白）願降願降

（大開邊）（岩上升明字旗介）

（橫波口古）亞媽亞媽，你睇吓旌旗蔽天，好一種狂熱情緒。

（血梅口古）亞媽亞媽，原來賀雙卿係一代慈母，呢一種艱難母教，可以與日月長垂。。

（雙卿笑介一才起小曲雄雞）

(棲鳳，血梅，橫波，貝爾，魯松和唱) 流淚眼看共相對，一朝解脫在門閭，齊合心，無謂恨相對，此去擎旗奪帥，光復帝京，只破清兵，生死亦無慮，哈……盡消散國難，邊關去，柳堤敵已退

(棲鳳花下句) 一呼振臂，壯志重恢。

(眾人唱煞板)

(落幕)

(煞科)